

البنائوت

شعر

زینب ابو الفتوح

إهداء

الى البنوته اللي
رضعتني حياه
و الوليد اللي طاييل بقامته
شواشي الشجر
الي النجمتين المتعلقين
في سقف الكون

مريب أبو الفتوح

عقد الكلام

اما انفرط عقد الكلام
على شفايف الوقت .. مات
اتجمد رصيف المينا
ساعة ما سندات عمري عليه
ياه .. ما صدقت سنيني تبوح
ايه لسه فيكي مخنوق يا روح
ايه لسه ما اتقالش ؟
الجراب فجأه ما استحملش
طار كل الحكاوي لفوق
اتشعلت ف حرف السما
و فرجتني على عمري
مالك يا روح .. ؟
متمدده ف حضن البكا

بتلفي سراديب الحياه
فكيتي عَقْد الصمت ليه ؟
مبهوره من سرب الحروف
و نُقْط الندي اللي بَلَّت فكرتك
فدويتني فيه
قادرة فـ بـراحك تحتويه ؟
مالك ياروح .. عصيانه ليه ؟
عاشقة جناحات الطير
ضمت قلب السحاب
نفسك تشوفي الكون
مكتشف .. بلا أبواب
بتطلقي دهشتك
من ضلمة السرداب

طب حابه ليه دمعتك ؟
وقت اكتشاف الحقيقة
و دايبه ليه في سنداتك
للعمر يم البحر ؟
راح تطرحي روحك
وتعودي كلك سحر
تتخلصي م البوح
و لا تلمي الصمت
أو تعقدي صوتك
حبات حروف
متشكلو ش لسه
على شفايف الوقت

السويس يوليه ٢٠٠٥

موضه قديمه

اللي انجرح إنت
و اللي نزف قلبي
وأما اندبحت ..
أنا ف الحقيقه اللي مت
يوم ما اتبعتر وجودك
و بقيت عدم
قمت انتهيت
حسيت بتلج بيجري
ف عروقي
و النار ماسكه ف جذري
الخايف ينكسف ليسجنوه
دمع الوداع .. موضه قديمه
و رميتي ف حضنك عبيطه

مبقتش تسحرني

و انت شايطني في جيب

جنب قلبك

و ضلعي بيصرخ

لتنساني مره

و تركن مشاعرك

في جيب الجكته

اللي ضمه خيوطها

حقيقه بتنطق

حاسب ..

لتكسر عيوني الإزاز

و إنت بتعمل إنك واحشني

بتحضن حنيني و سكاتي

و تعصر كياني وكذبك لاففني

شايفني ..

في ركن منسي

و متهاله عليه السنين

شقاوي يا قلبي

و مسقي انتظار

و وعد و أماني

ف برواز خانقني

بيسلب بريق

انتفاضة نهار

و يرخي على صوتي

شعاع منكسر

السويس مايو ٢٠٠٤

مناطق للحزن

الواد ابو كرافته ..
خانقه الدنيا ف طرف عنيه
وعنيه مدسوسه ف كعب سنيني
سنيني تعبت م التفكير
لساه بيقالب نظريات الكون
و يوزع دخانه
على وشوش البنات
اللي بتفرح .. بلمسة قرب
القرب جناح بيطويني و بيرفع جسمي
الثقل من حمولة السكه اللي ..
فوق بعضيها
و بيسألني.. حابة تشوفي نفس الدنيا ؟
الدنيا المكتوبه ف حبر القصيده

القصيده اللي بكيت من ضعف الكلام
و حمل الحروف المايله
من طول الانتظار
و الانتظار بيشق ريق الحلق
و يطلع تنهيدة مره
مره كوياية الغرام الساقع
لما تتشرب فى طوبه
طوبه من بيت الحلم وقعت
جرت وراها خيط الأمانى
الأمانى اللي اترسمت
على صفحة ندى ...
ف أول ريح خدت بعضها
و سلمت ع الحزن

و خَدَّتْهُ بِالْحَضَنِ
الحضن فاضي .. و الندي
بَطَّلَ يَقِفْ عَلَى وَرْدَةِ قَلْبِي

السويس يونيه ٢٠٠٥

المولد

الزينات طايله شواشي البنا

والرغبه فى الوصل

طايله سابع سما

الله .. حي

يا حي حبك ع القلوب طاغي

يا ساكن المنتهي

و انا أيش أوصلني

يعني أما ألم المدد

في حجري .. وفي روعي

و انسى الوشوش

الدايخه فى الزحمه

هتضمني أبواب هداك

يا منتهي .. الأمنيّه

مداد ..

العروسه دايبه موت ف الحصان
كورنيش الورق الملفوف ميت ف الألوان
و انا امي كانت تشيلني فوق طرطوفة عودها
أدلدل رجليه المتعشمين بالجري
ترفعتي فوق سحاب المدد
و خيمة الدخان
أشد الحلم اللي واقف عيني
و اشاور ع الحصان
يتعلق حنيني في طرف سيفه
و فجأة أخبط في حيل المدد
مداد .. مداد
ركبيني يا امه ع الزقازيق

خليني ابوس السحاب
و اشتكي لربنا
و انزل أغيط الأرض
و ادبدب برجلي على ظلمها
كورنيش فستاني بيطلع
و بينسي بصة عين امي
تجري ضفايري تشد رقبتني
تخلعني من عمري
أقرص خدود امي تبك الورد
ترمي الحروف الفاضله م الزهق
ع الأرض
(البننت عروس – والواد حصان)
يا سايبه شعري بيرمح

و دراعي راح ينخلع
راح اكسر وسط العروسه
و اعرى ف دماغها
و امزع التل اللي حا بس وجعها
و بارمي عيوني .. فتحضن
ف شمخة عيون الحصان
و قلبه المعسل
و احسه بيخطف ضفايري ويجري
يا سنتين فلج
الضحكه شخيله
صلي على سيدنا النبي
سمسميه يا حكاوي الهلالي
لافه وداني بشاله الحرير

مربوطه بدراعه
و انا قلبي فرفر لما نمت
فوق سجادة علاء الدين
و بصيت على دمع المآذن
اللي بكاهم غطي على
قصص المداحين
و انكسر سيف
اللي راكب ع الحصان
نزلت دموعي ع العروسه
دابت ...
مفضلش غير ..
كورنيش ورق
الوانه دايبه

ف

المدد.....

مدد.....

السويس من ٢٠٠٣/٧/١١

الى ٢٠٠٥/٥/١٤

البناءوت

{ ١ }

محتاجه تكون إنسان

يرسم على وش اليوم

حركة فعل .. من غير

ترديد آيات الهمس

و الاختباء تحت

تاء الاحتواء

و التسييس

{ ٢ }

رافضه النهارده

تشدد الضفاير

و ترميها على سطح البلوزه

عايزه ترفع صوتها

تطلب براءة اختراع

حق الاتوثة .. واللذاذه
رغم صوتها اللي محبوس
فى عنق الإزازه
و محاطها ضل نونو
كل ما تورب يعفر
فوق طموحها
تترمي جنب دولاب الخزين
تتعجن .. قرص
فى ماجور الطحين
تشاور للبت النونو
بإدين متشميرين
حاولي تكوني
يمكن فى يوم القاتي

فى عنيكي
بائنطق و باخرج
بره شرخ الطين

{ ٣ }

ازاي تسمحي للشبابيك
انها تتستر على دخول الهواء
لقلبك المأسور
ممنوع عليك
استضافة بصيص النور
حابه تعلني مثلا .. وجودك
فليكن .. لكن
بصوت مستور

البنائيت
حابين يغزلوا
فى شيلان الحريه
و يوزعوها هدايا
فى يوم المرأة العالمي
و يجمعوا صوتهم
فى بير غويط
و يقفلوه .. ليدلّق و يغرقّ الدنيا
تجري كل العصيان
و الصقور اللي نامت
ع الشنّبات
و بصّة عين الأمهات

اللي بتنفذ قهرا
بنود الإستعباد
علشان ما تحوز بالرضا
و بركة النفحات
لجل البناويت متبات
مقصوفة الأصوات
و تفتح بوابات
دنيا الشوار
لرميهن فى
عداد .. العروسات

السويس ٢٠٠٥/٥/٥

دنيا

باغريل روجي
و افضي الهم على سطح شفايفي
و ابوح بحروفي الزهقانه
من كثر تغير الكلام
و من إزازه الحبر الاسود
اللي ماليه الذاكره
يوم ما افضفض تندلق
تملي السطور
تجري أحزان السنين
ورا بعضها ...
تتشبك حبات إديها
و تلف حواليا دواير
خايفه تبعد

حاسه بالغدر ...
لو عنى رحلت
قد ايه للحزن أصل
ينفرد .. يملئ كل الكون
يسرح فى شعري
و يعقد ضفيري
ينشف عنيه
بمنديله الهديه
ياه.. كان أد ايه
غالي عليه
عمري اللي يا ما اتنطط
على حجر زماني وفار
و لون شبابي المندش

بالورد وقت النهار
و عيون آمالي العنيد
بدوب ف عشق الحياه
و بتتصر دنيا
و الدنيا ...
واخده الحكايه هزار

السويس اكتوبر ٢٠٠٤

تقدر تكمل؟!!

و باشدنى من بين رموشك

جفئك يحوشني

ألقي إديك بتضمني

حبة دموع

خليك مكاني

لو إنت حسيت بالحياة بتنتهي

تقدر تكمل رحلتك

و إنت أسير

لخطوه فارضه نفسها

على رغبتك؟

تقدر تكمل؟!!

مجروح كسير

ومقضي ليلك ذكريات

والنور سطور
متبعتره في وسط المسافه
طابقه حيطان سجنك عليك
شاده في روحك من بين إديك
وموز عاك على كل حلم
بينتحر .. ساعة ما يتحدد
موعد لقاءك
تقدر تكمل ..؟
وسط النخل اللي بيسقط
على راسك .. حجارة موت
خليك مكاني
مش راح تحلف
بالسما و الصفصاف والتوت

إنك من قلبك
راح تنوى الموت ؟

السويس أغسطس ٢٠٠٤

بره نفسي

ء حيطان و عمر طويل

فى آخره .. وشك

بس الحقيقه

انا مش هاغشك

الحلم مولود ميت

و يوم الطرح ...

الزرع صابُه العطب

ام الجدع مفطوره م البكا

والبنت النور

نازله شاحبه

كان فيه .. كان لسه

ماكنش ...

أصل الحلم الخايب عمره قصير

و التوب الدايب ياكل صاحبه
و يموت العصفور لو غَمّوا عَنيه
وان ربطوا جناحه
راح يصبح زينه
مخنوقه حلاوة زأزأته
مشنوق على اربع حيطان
صدي صوت .. بايت
بيكرر نفسه
زي راديو قديم مركون
على .. رف عمري
فجأه .. البرد بيخبط
جدران العمر
الخيطة اللي بيربط أيامي

بعضيها بيفك نفسه
و يحدفني .. بره نسيج نفسي
أقع غرزه .. غرزه
لحم السنين بایش
و الإبره اللي شدت
توب الستر
إتقطم ضهرها
فجأه

السويس ديسمير ٢٠٠٤

سجون العتمة

و بارميكى يا آهة جرح
على جدار الزمن الأخرس
ترُدلي ..
تعدى عقارب الساعه
تشيلي العمر ف جيبني
تعديلي ..
ثواني عمرنا المجنون
بتتأخر ..
قصور الوقت تتبخر
مهيش عايزه زمن أكثر
ولا بتحلمش
برعشة رمش
بيسافر بلاد النور

بيتحرر .. من الألوان
و م التصاوير
بابيعك يا آيات الوحده
و بارفض أجعلك وردي
كفايه التلج و الضلمه
و سجنى فى متاهة ليل
كتاب الانكسار حفظاه
دبول الورده ف خدودي
ده شئ عادي
و ليه اللعب معاك حذر
و اخبي بايدي رمش عنيك
مدام عمرك شتا على طول
سجون العتمه شط كبير

ملان خفافيش
ما بعشق هوش .. لكن زرتة
بآهه خارجه بالراحه
و رافضه الهدنه والتسليم
و رافضه الكلمه تتصلّب
أو تتغني ف بلاد صم
و رافضه شكل حريه
محز مينها بالتفكير
مزوقينها بفيونكه
و رمينها ف قفص
عصافير

السويش ١٩٩٨

الورق

ساعات .. بيتخانق معايا

يطردني م المكتبه

و يشدني من وداني

و يفرق أفكاري

على أعتاب البيوت

و ساعات .. بالقاء

نسمه ..

تبرد بركان القلق

و نار الكلمه

يضقر ف أشعاري

و يبعثر قدومه ع المكان

يدوب ف حبة شاي

و نقطة حبر

يبقى .. كحكة عيد
ينقشها وجداني
فوق ابتسامة فجر
يشرق ف زاوية روح
و يدغدغ العمر
اللي وكلاه الجروح
يمسك إديا و يطير
على آخر حدود
عطش الطين لحضن الخضار
و القاني متمدده
على كل سطر بقول
و بتنطط على مرجيحة
كلمه بعيده

مشدوده بادين الزمن
اللي فات
و بكلمه ثانيه ادوخ
ف الزمن اللي جاي
و هو بيفتح دراعات الصفحه
و يسلم على سن القلم
و ييوس ..
صوابعي

٢٠٠٦/٢/٢٠

سندريلا

باظهر و اختفي
بنور و انطفي
و افتح قطن و بنفسج
و باقفل شيش و كتاب
و سيره فجاء اتفتحت
باظهر .. في لحظه
و اعدي على ضهر العمر
و اسلم بيدي على ذكرياتك
يوم .. يوم
و اختفي وقتن تبطل
الاندهاش
البصه دي .. محبه
انك تحاول تفتكرني

بلاش
بنور .. يمد تحتي
ألف جسر عبور
و تجيني أحلام النسا
عاملين عندهم سور
و انا وسط منهم
حبة اسئلة
محتاجين تفكير
و اطفى شمعتك
بنفسي اللي محروق
انتظار
غبت عليه
و انا لسه مبتطلتش

اسقي زهور التمني
يمكن في يوم
الفاك بتدور
على حته من عمرك
نسيته عندني
بافتح ..ضحكه
ف شريان الندم
و ازهر بنفسج
بيحيا رغم الألم
و باقفل أي رغبه
ف الهروب منك
و باخرج من شقوق
روحي

و اسيبلك ليله
من عمري
تجيبك
بعدي تستنى
خيال يجي مقاس
ضلك
و باتمنى ..
يكون فيّه اللي
فاضلك

السويس الخميس ٢٩/١٢/٢٠٠٥

اربع حروف وقمر مستني على سطح بيتنا

الزين .. زمان
كان جميل بينطق
جوه قلب الغيب
و يحضر الذكرى
الياء .. يمامه
و كنت باعشق زيه
ملفوفه بالحلم طايره
لفووق
النون .. نصيب
معقود على جبينك
يا نيل
يتعددوا الجايين
يتمنوا يوم شهدك

يحلّموا بزهو احتلاك
لكن .. بعيد عنهم وصالك
و الباء .. باكون نفسي
لما باحب ..
بادوب ف طيف القمر
و اتداری ف تنهيدہ
با حبي على سطح دارنا
و اتخبّط ف عماویدہ
و بتشاقی ف حجر امي
و يخينني ابويا
ف صوته
أكون .. أعيش
أربع حروف

من طين
و جوز عيون
معجونيين بالصدق
تلاتين سنه
و العمر بايش ف دمع الندى
مين ابقى انا ؟
و ازاي باعش
بره خطوط الحب
بره لهيب النار
لبستني العمر
و لا بيهدي خطاه قدامي
و لسه سؤالي بيتمرجح
بين صوابع نجمه

راكنه فوق سطح بيتنا
من يوم ما اتولدت
مين ابقى انا ؟
كرّيت ايامي وسألت
طاطط و تاهت ف ركن
مليان كراكيب وجع
بصّيت لصورتي ف
قضبان المرايه
اتنهدت دابت بخار
باشت على عتبة سوالي
تلاتين سنه
نفس الكلام
بيتردد على لسان النهار

و الليل
و العمر زايد لا يوم جاب حديد
و لا خد من تل الملل
و لا مَلَّ العالم من
كثر الكذب
و لا يوم، وقفت رعدة حلمي
بالحرية
و لا يوم .. بطلت استنا
القمر
على سطح بيتنا

السويس

سابعه في شلال دمي

بتفكريني بالزمن الداير

و الأيام العايمه

في بحر التواريخ

فانوس بينور حبه

و ببسكت ساعة الريح

و ورده بتحضن قلب كتاب

و قصيده بترقص فوق شفايفي

لما بتتحني بلمسة حبر

كوباية الشاي الوالع

و الفكره الصافيه

ف عقل تعبان من الفكر

و لما بتتكلمي .. بنكفي ع العمر

و اقرا فيه كل سطر

يحكي عن حلم اتشباك
في نظره لبكره
الطريق الواحد .. إشارات المرور
مريلة المدرسه
كوبري الحياه
اللي ما يصدق نعدي عليه
يحضن خطانا
درس كيميا محضرت هوش
كنتي نصي العلمي خالص
وبمنسهوش ..
بتفكريني بالحاجات والزمن
و فارس الأحلام
و الحلم اللي ما اكتملش

و قطر الدنيا الطاق
و فلنكات السكه الواقعه
و رومانسيه ما بتتحققش
كنتي العقل .. و أنا
كنت الطيره العايمه
في بحر الروح
بس نسيك حبه
و اما كتبت حروف من إسمي
لقيتك بتغمي عنين الصفحه
فعرفت إننا واحد
و انك سابعه .. في شلال دمي

٢٢/١٠/١٩٩٩ الى ١/١٠/٢٠٠٥

قرص الشمس

" و تلك الأيام نداولها "

و اللي رماك بالظن

مسيره يجرح جبينه

صوت النّدا متعلق

فى حرف الكون

و متمدّد على سنينه

وقت اما دورك يحين

و تبقي شئ مقدور

راح تقرا صفحه بصفحه

ايه كان هناك بيدور

و أد ايه عمرك

كان عقل مُغمي عليه

وقع فى لحظه ومات

فضيت من نورها عنيه
خبطت في الماشين
جنبك على الصراط
و ضحكت من ضعفهم
و كبرت جوا الذات
" ولكم في الحياة قصاص "
سيفك شطر الأمان نصين
نص اترمي متجرّح
والتاني مستغرب
مين علمك أصول النشان
و انت اللي يا دوب
طوبه ..
واقعه من حافر حصان

إيه اللي فجأه جرّأك
خلاك تقطّع فى حبال الهوا
و تدغدغ السكه الحديد
لجل ما يصبح لقانا مستحيل
وشك بينزف .. زيف
ألوان كلامك بتسيح
وسط سخونة قلبي
ما انتاش ..
قد الكرسي العالي
المادد ..
لقرص الشمس

السويس سبتمبر ٢٠٠٤

امنيات ما بتحققش

هافضل كده .. أستنا لما تدق

باب اللحظة تتكشف

أسرار الوقت

هافضل أطبب

على قلبي يهدي

و يبطل عند

صعب .. اني ابوح .. اما باشوفك

باخنق صوتي .. و يفز من صوت ابويا

وشاله الثقيل يكتم على كل الحروف

بصة غضب توقف الكلمه ف لساني

و رافعة عصايته لفووووق

و نزلتها على دماغ الارض

ترعيني

جوا جوفي خرفشة كلام
نفسى أدلوقهم حرفين حرفين
قدام عنيك لما تعدي
على سور قلبي
و انا واقفه برقب جايتك
من صلاة الفجر
و بافتح كتاب الأمنيات
و صفحه .. صفحه باسمع
باحبك يا صبح
عشان بتطرح عليا ابتسامته
و احبك يا ليل ..
اكنك غموضه و حيرته
و لون جلدة كتابه

اللي مليون
احتمالات مبيتحققش
و أحيانا .. باحبك يا خوف
علشان مبيتسمحلش
إني أبوح
و احبك يا ابويا
قد ما حابّه .. أقول
زي البنات
و أوّري عيوني إزاي بتضحك
ساعة ما تحس بطوله بينفرد
على ظهر الطريق

٢٠٠٥/١/٢٩

رحم الكون

با شوفنى فى مرايات مشروخه

جوايا مهدود متجرّح

أجرى أصلح لون مكياجى

يكبر حجم الجرح و يصرخ

تبعد عنى ...

الخطوة ... أتمرجح

تطلع روجى برايا ...

وتسرح

أتشد لتجويّف الكون

وأبعث نظرة عليا تروح

ترقب جسمي الواقع منى

تسمع نبض القلب يغنى

آخر لحن ف بحر شجون

ترجع تبكى يظهر انى

بفكر اعود ..

لرحم الكون

السويس نوفمبر ١٩٩٧

بداية حزينه

" أي دمهة حزن لا "

أي همسة آهه .. آه

أي أغنيه حزينه قولتها

كنت صابّه الحزن

فى كاسات عمرها

لأجل اشربه

واما عديت .. يوم عليه

عزمت عليك

روحت بالل ريقك

بأول بق ف أول كاس

كنت ناويه ابتي الحزن

بيه

السويس أبريل ٢٠٠٥

إحساس

هات لي من قلبك إحساس

هات لي من روحك ضي

هات لي من عمرك ذكرى

تخلي الميت .. حي

السويس ٢٠٠٢/٧/٢٦

غلب

مخبوط على قلبه
و بينزف حب
بيمثل دور الضحية
فى عيون ساكنه
غلب
متوزع عمره
ما بين الجرح
وبين الدمع
خايف يبوح
ليشهدوه على روحه
وهي بتطلع سلم
المنتهى

السويس ٦/٦/٢٠٠٥

شريطة ستان

لَسَّانِي جُوا عِيُونُكَ هَم
و إِنْت فِ عَمْرِي كُنْت أَهَم
لَسَّانِي حَبَايَةِ الضِّي الْفَاضِلَه
فِ عَيْنُكَ
و إِنْت بِتَسْحَبْ آخِر شَيْء
فِ رَصِيدُكَ
و بِتَوْصِينِي عَلَى رُوحِي
و أَنَا بِأَفْرَدَ عَمْرِي
شَرْيَطَه سَتَان
فِ طَرْفِ الْبُرُوزِ
الْحَاضِنِ صُورَتُكَ
و بِاخْلَاصِ رُوحِي
مِنْ آخِرِ بَاصَّةِ عَلَيْكَ

و اسقَط دمعَه
فِي غَابَةِ رموشك
باسقيك الحلم
اللي معشتوش
و باقفل أبواب التمني
صوت الرصيف اتحسرج
شارع عمرك انتهى
كل الخطاوي مروحه
والعابرين جنبك هوا ..
و أنا
و حدي باحسك
خطوتين باقيين في ضلك
ليه بتجري .. ليه تعزيني

فِي عَمْرِي
بِتَحْسَنِي بَعْجَزِ ارَادَتِي
و انا فاقده حتي الاعتراض
إنت .. كنت افتراض
لحبة حياه
خلصوا بدري
دَوِّبُوا عَمْرِك فِي عَمْرِي
إنت .. قررت الغياب
و أنا .. مكتوب اعيش
أَفْشَشْ فِي دَوْلَابِ الْبُكَاءِ
و انشر ف أحزان السنين
انشف الدمع بآهاتي
و انسِي رُوحِي بِالْحَنِينِ

و لما اتعب .. أترمي
على شماعه تايكه
و اتركن على اقرب ناصيه
في طريق الحياه

السويس سبتمبر ٢٠٠٤

زلزله

وَبَقَّ عَشَقْكَ مِنْ فَلَائِكِي
و ارحل لأبعد من شطوطك
و ادوس على قلبي لبيكي
اضعف و آهتي تدووب في صوتك
ارجع احضن تاني جرحي
و ارميه على أعتاب حدودك
و باسيب إدياً تقول وداع
و الملم الفاضل ف بكره
تُضْمَنِي حيره و ضياع
و حُب يبيكي ألف ذكرى
و أنا با هجرك
جوايا الف اااااه و لاااااه
عيزاك و كنت المنتهي

كنت المراسي و الأمان
و صبحت غيب ... و آه .. و كان
و بودّعك .. تزلزل الآلهه كياني
و يسقط الدمع الحجر
يضمّني صوتك لصوتك
جوايا ذكري من وجودك
لكن بخاف قسوة شروذك
و انسي اللي راح مني في موجك
وجع المراسي رنة الحزن
ف حروفك
و باودّعك بشراع كسير
ينزف ألم .. ساعة .. ما فوتك ..

السويس

صورة زفاف

الريح بتبعتر غناوي الناي
و بتضحك زي ليلة برق قاسيه
بتدوّب الانتظار
فى برّاد الشاي
كانت عنيك مزروعه
فى آخر خطوه
مدّيت بعدها وركبت عمري
و بُعدت ..
عندك بيدّيح ف تفاصيل
صورة زفاف
كان مفترض انه جاى
متزعلش ؟
قطعت صورتك حتتين

حتة قعدت فيها لوحدي
حاولت لآخر مره
أتملى فيك
و رغم حلمي المستخبي
فى نور عنيك
فرقتهم على اربع نواصي
بيطلوا على مشربيه بيتنا
عشان كل ما ارمي نظري عليهم
أكرهك

السويس ٢٠٠٥/٦/١٨

مسألة قسمه

انا كنت حاسبه حسبتي
و انت ف آخرها
أطوف بعمرى ف دنيتي
و أنول وصالها
أملى سفاين حلمي بالحياه
و ف بحر من غير اسم
ارمى حملها
كنت انت ع الشط
انتظار
رايه .. شمندوره
عاشق سرسوب ضلّي
بتقول عنيك
أنا .. أول الرحله

أنا البحار ..
شوفت احتمالاتك
قدر ..
حبيب يعاند
عارف طريقه للوجع
حبيب ف حزن
اللؤلؤ ف جفوني
وقت أمّا اسلم لك
مصيرها
غطيت خطاوي القدم
بشلالات الشوق
و طلعت الحسبه غلط
قسمت ف وسط الموج

جئيت عقارب بوصلتك
البحر هايج
و انت بتضرب ع الشط
كف ..
وبتنتظرنى
بألف أمنية حياه
و البحر قايل كلمته
الجمع لأ
القسمه لأ
الطرح آه

السويس

وعد البنفسج

بعد انتظارك ميت سنه
التوتة لمّت ضحكها
خبت هيامها فى حلمها
غنيوه كانت مشمشي
باحت بشي ودارت ف شي
وعد الشتا .. دايماً عيالي
بيتردد .. بيخاف م البرد
المدوي ف السكوت
الوعد .. موت
و انت انتظارك
الف موت
يا مشتهيني رمّانه
يا معلق النجمه فى ليالي

كون قمر..

ما تكُنش حوت

يبلغني ساعتِ دهشتي

وقت امّا الملم فيّا شئ

كنت افكرته بينتهي

و يدووب خفوت

و انت ابتديت

قطف البنفسج

اللي كانت نظرتّه

رعشة مدي

فلقة صباحات

انتظار عمر الصدي

لمة شتاتك

دلوقت غضبه .. بيدبك

ساعت تحاول ترمي طوبه

ع القمر

تفتكر انه ف يوم

هيريحك !؟

السويس ٢٠٠١

تلج

الأحلام بتموت ساعت ولادتها
و الأيام بتسوء من تكرار إعادتها
النشره بتحذف تلج
و نشره قلبي بترجف
مكتوب .. السما هتمطر
خوف
و رياح هربانه من آخر
جولة كذب
ملفوف بكسوف

حكاوي شهرزاد الحكاية الخامسة

بلغني أيها الملك المتوجس

ذو القلب التعيس

بأن اللي كان ف الغيب

وساوس

و انت اللي اتقصد بالهم

كل اللي خاتك كان كده

امّا انت زي الفجر

عمرك نقي

بتحب حضن الضي

و بتعشق القلب التقي

ويا مليكاً أنا منه

أحدتُ عنك لو سألوا

أتسمح أن أحاكيك

بلغه يوم لم تُرامنه
بلغني يا مالك
إن المواثيق بتهالك
و إن الوريقة اللي ما اتكتبتش
ماتت
دلوقتي حلم البنات
عقد و ورق مشروط
تكتب عليك السكه و تربطك بقيود
و إن طق بركان غضب
تخلع ما تترددش
قالوا الزمان اتعدل
و الكفتين اتساوو
يعني شوية عدل

للبسكويٲ ليسيح
و الحق بقه يتاخذ
مش إذن و لا تصريح
و إنت .. على الراس
لكن بلا تجريح
تهيج سفاين غضبنا
نترمي ع الشط
لا دمعته تحرق خد
و لا شنطه شايله العمر
و لا سيف بكلمه يهد
يا سيدي مهلاً
قد كان مِنَّا العذر
و لتحتمل صبراً

لما الطوفان ده يمر
يا نكون نفس واحد
يا تحين ساعات الهجر
عمر الطيور يقصر
لو كبلوها ف قصر
بالعافيه متغنيش
و حوافيه زيها
جنس اتخلق فيعيش
مش روحه جوه الورق
و الشخط و التهميش
فيه اللي يهوى الطير
و القعده خلف الشيش
فيه اللي تتهامس

و تموت ف ساعة عشق
لو بيتها كان م الخيش
و مئة واحد تحب
حب الإراده يعيش
صوتها يكون مسموع
نظرتها سيف قاطع
لا تنحني بالقهر
و لا تتركن تبكي
تستنى لحظة صفح
أيقنت يا ملكاً
أن الأواني تنثور
و تطلب الإصاف
من كل حر جسور

و العيشُ بالحبِ
و الحرُّ للحرِّ
من دون أقياصِ
حتى و لو ذهب
و العمر مش ورقه
و جدار ف لحظه يخور
و اهو هو ده المنتهى
عيشاً على أدبِ
أو .. خلعاً بدون فجور
و يادنّ الديك النهارده
و بكره أكيد هنقول

السويس من ١٤ مايو ٢٠٠٥ الى ١٩ اكتوبر ٢٠٠٥

طفل جميل إهداء الي الأديب محمد الراوي

عمر ك شفت النخيل
بطل بالبلح يحبل
أو إن الشمس إترددت
مرة تطل
ولا عمر ك سمعت عن
قلب بطل يدق
اهو انت سن القلم
انت دواية الحبر
مكتوب عليك الشجن
مكتوب علينا الصبر
لحد ما تحبل سطورك و تولد
و تحبي فوق العمر
تطول رفوف المكتبة

و لمبه متحزمه في السقف
تستني طيف نومك
لكن يطول الصبر
إنت ..
طفل انبطح ع الأرض
ينزف كلام
غمر و سرح في الوقت
و بساط علاء الدين
يحملنا فوق بعضنا
نتخيّل السكه
نتعلم الحلم
نتهجّي في الضحكه
و نرسم زيّها علي الورق

نكون روح
دايره تحبي .. تتعلم التنقل
ياه ..

أما انت بجد طفل جميل
روح الولاد السمر
متعفرتين ف الحاره
حارة زمان الطيبه
ياه ..

أما انت بجد ولد شقي
بتلف في سيرتنا
بتنقل علي الملائكياتنا
بتشبه يوم الخميس
و زحمة الشارع

و قصر الثقافه اللي
نايم فوق حشيش الجيش
و تشبه ليالي المؤتمرات السخنه
شنطه مليانه بالأحاسيس
ياه ..

أما انت بجد طفل جميل
روحك احلي من البلالين
و ليس العيد
ضحكه ف عينك بشوفها
ليلة رؤية هلال رمضان
زي الولاد الملمومين
ع الأوله
و الحق يخطف سن

الطفولة

ياه ..

أما أنتِ حكاية

بجد جميله

فتي أسمر الي روح الجميل / فاوي الشريف

فتي أسمر وعود خرزان
و لفة حُب ف يمينه
و كيس مليون بلح أمهات
و بسمة وش سنتر فيش
ترش العزه ع السامعين
فتي أسمر ... زنده الشعر
و متعافي بحُب الناس
و مدّفي بصُحبة عشره
من أخلص حروف القول
و صوت أقوى من الخفافيش
و خيل ف القلب بتردّع
عشان تخرج
حدود الصمت كالماتريس

و آه من عزه لما تصير
من المحابيس
و حافر ألف ألف حُصان
يدق برجله ع الفاضي
ما دام الحرّ بيموت قهر
و صاحب ملهي عصر الذل
بقي قاضي
حضنت يا فاوي جوف الليل
بتستني وطن
مهوش عادي
و مش راضي
بغير العِزّه و القومه
و صرخة كبرياء العمر

جوه الحلق مهزومه
ناديت سمع النّدا عمري
جريت أفتح كتاب المعجزات
لقيت ورق السنين بايش
و دمه تشق خدّ القلب
مفيش تاني نّدا ع الخيل
و لا دعوه
بصوت عاشق لنّبض تراب
حبيبة العُمر تمشي عليه
يا فاوي .. إيه ؟
خلاص خلّصت
سيبت الحلبه للراضعين
لبن فاسد

و نايم جوه ضمائرهم
شيطان كالبش على الهمه
و سيبت لمين
حدود محتاجه
حرس صاحين
و بعدك نبوت الغفير مركون
على جدار السنين ساكت
و مقسوم ضهر الكلام
بعدك ..
يا فاوي .. دمتي حارقه
جفون العمر .. على بعدك
عرفناك ليه ؟
و ليه حبت قلوبنا عنيك

سمارة وجهك الناري
و حُرقة قلبك المكلوم
على وطن اتحرم من الحب
و م التصريح
و كنت الفالح .. و كنت فصيح
بتقدر ترضي نيتنا
و بتصالح ف قهر
غباوة التلميح
تقول انت و احنا علينا
نقول تاني
و ادينا بنبكي عليك
تاني ...

السويس الثلاثاء ٢٠٠٥/١١/١٥

ضي ف عيني واصل لسقف الروح

حامي رصيف البدن
شارخ ف جدور العمر
غارزه إديّه
في شرب الآهه و الحيره
بين نون العذارى
و حلم البنات اللولي
مسنوده على كتف الليالي
بادعي من جوف القلا
يخبط على بابي
خادم المصباح
يا تاج مدندش
بضحك النجوم
و سهراية قمر

عاشق يلاً ف السواد
بتشوفني ليه .. و تستخبي ؟
هو انت حالف
لتجافيني ؟
اكني كالبشه تراب
السكة بيمينني
و مولعه الكانون
يسوي آهات عمري
ما تحاول مره .. ترمي
المنديل أبو قويه دايبه
و خرز تاك
و جلابيتي الدبلان
اللي عاشقه

ريحة النوم على سطح
فرن اتكوى
من حضن ايامنا
فيها ايه لو تدخل
بيتنا المعتقد بالشفقا
و تحطني
فوق سطح دارنا القش
و انا لابس زِي
أميرات السعاده
و بادوس بكعبي ع السنين
فتفز
تعمل عجائز .. تنحني
من ضي عيني

اللي واصل لسقف الروح
ياه .. لما اطبطب
على ضهرك يا الفانوس
ينطرد غضب السنين
اللي .. كان محبوس
و تزغرت الأيام
مع ضحكة الحظ
اللي كان خايف
يدق باب
بيتنا الحديد

السويس ٢٠٠٦/٣/٣

الكابوس

مركونه كل السيوف

ع المحيط

و بدلة الصولجان

و البندقية الميري

للعرض فقط ..

رافعه إديها جلدة التواريخ

بتلم دمع السنين

و عز عمره ما فكر

إنه فى يوم هشيخ

كل السيوف اللي بريقها

كان يعمي عين الريح

ماتت على روحها

فجأة .. رجعت

كل السنين .. للخلف
و بتترعش م الخوف
عايزه الكابوس ينصرف
يحلف ما هو مصروف
دمع الحيطان فايض
نازل على جدورها
و الذل نظره بتتكسر
على مزلقان العمر
البيت .. تاريخ قديم
فى كتاب كبير اصفر
عجوز .. مركون
عصايه تايكه
كانت بترهب

لعب العيال
شخطه قديمه
متسجله علي جرافون
إبرته انكسرت
م الركنه
رسومات صواب جددنا
بيحدفونا بالجتت
بيصلبونا على روحنا

السويس يونيه ٢٠٠٥

صورة ابويا

باعلقك يا صورة أبويا
على باب البيت
لجل ما تنشف بيبانه
وقت الشدة .. ترزّع
وتشيل وتهبد فى الهوا
مهما يغويها
تتمسك بالحيط
بالحجر المعجون بالعمر
المادد فى شروخ الطين
بالعواميد
و بلحظه تكون ..
او تستغني
عن دور الفارس

و تهويّ ع الاعتاب

و تنقي الرز

مع البناويع

السويس ٢٠٠٥/٥/٧

محاولة

بارفع إديّه و احاول أطيّر
و اخبّط في موج الهوا
فيكسرني ..
القاني نازله لسابع ارض
كتبت يافطه كبيره .. بتقول
لأه .. مش عايزه
أتخنق ف دايره
و لا عايزه شكل مربع
أضلاعه زي بعض
الطول زي العرض
اللون مفروض .. فرض
الليل مسكون بالصمت
و رعشة كل حروف الكلمة

و خبطة قلب كان فاكراً
إنه جرى ..
و هايقدر على صد الريح
بإديه
لكن فجأة اتحدف على طول
دراعات الخوف
لمّوه من تحت رجلين
تلاميذ المدارس
اللي بيتهجوا حروف العمر
و بيسمّعوا أناشيد الحرية
و يرفعوا أديهم لاجل ما تطول
العلم .. لكن .. مبيقدروش

السويس مايو ٢٠٠٥

من غير ما اخاف

با اتبرئ م الزمن

اللي فات

بالم كل مشاعري و اجري

زمن الاباحه فى السكات

و نبوت الغفير

و كحة ابويا تنطق ف سري

ساعة ما اوشوش نفسي

باللي شاغلني

شعري .. ماشي دوغري

خايف يطير ..

لعيون أبويا تدبحه

جرس الطابور

فجأة نترني م السرير

وصلبني على كل سور
عديت عليه
علامة استفهام
ما بين عيوني
و الطريق
كل ما احاول ..
طرف الإجابة
يكش .. و يخاف من بصة
زراير بدلة العسكري
اللي واقف على
ناصية عقلي
باكلم روعي و أتجنن
و اسهر معاك يا قمر

حاطط عينه .. عليه
و مكلم امي
ما تنتقل من ريحي
باعلى صوتي عشان يطولك
و يوشوشك
استنا لما ضحكة امي تبان
و هي بتقلب شبابها
فى كباية الشاى
وتقدمه لايويا
فى صينية العشا
دلوقتي ها تكلم براحتي
ليه لاه م المبتدي
عامله حصار على عمري

الحب لأ .. الرفض لأ
الاعتراض على الظلم فجر
الاحتفاء بالطهر جبن
النومه ف حضن البراح
وقت اما العيون
العاشقه تفاصيل البوح
تكن .. لأه
يا قمر .. إنت المذكر
الوحيد اللي باطرح
عقلي عليه
و باعري افكاري
و ابعتر دموع خوفاي
و رفضي

و با اقبل اني اصعب عليك
و بارمي كل الورق في وشك
و المة على نورك و اقولك
من غير ما اخاف
باحبك

السويس ٢٣/٣/٢٠٠٥

طاقة نور

يا نجمه حاضنه السما
و سايبه اديكي لفوق
مين عَلمك فن اللآلة
مين ذوقك بالضبي
و وهبك الجناحات
علشان تطوفي بشوق
و لا تحبسك شرئقه
نورك مجرد همس
من فيض جبال النور
مرجيحه بتفرجك
ع الدنيا ... من غير سور
مين عَلمك والنبي
فن الغياب والظهور ؟

مين سَكَنك فووق
علشان أبخلقتك
أملّي العيون بالحلم
و اتمني أكون جنبك
روحي هناك بتدوب
ف ساكني الملكوت
ف مِسك هابّه روايحه
ساعة السحر في سكون
بتلف كون قلبي
بتقلّه جب .. دوب
عمرك يا نجمه سمعتي
عن مهرجان النور ؟
و شرشات النفح

فِي سَاحَةِ الْقَدَرِ
بَتَأْفِ نَفْسِي كَثِيرِ
وَبِتَتَسَحَّرِ وَ تَمُوتِ
تُطْلَعُ أَهَاتُ قَلْبِي
مِنْ سَجْنِ عَبْدِ تَابُوتِ
تَفْرِدُ جَنَاحَ مَسْحُورِ
وَتَشِيلُهَا طَاقَةَ نَوْرِ
تَمْشِي فِي مَوَاقِبِ مَغْفَرِهِ
تَلْبَسُ حَيَاةَ تَانِيهِ
مَهْيَشَ صَحِيحِ دُنْيَا
لَكِنْ بَيَانِ وَ قُصُورِ
وَوَشْوَشِ بَيَاضِ فِي بَيَاضِ
كُلِّ الْعَيُونِ دَائِبِ

ف نظرة وَصَلْ .. و دَمْعَة المُشْتَهِي
لحبيبه .. ساعة ظهور
يا نجمه .. ضُميني .. المسي خوفي
شيفاني من جوه ؟
رِعه ف بدن طافي
على موج سحاب السما
يُتمني سِر سوب رضا
و نظره تحضّني
و توهه وسط الأحبه
تُرَدّني مجبور
إنسان جديد خالص
من أوله مغسول
مشدود على جبينه

خطين بخط القدر
أنزل ليوش الأرض
أبدر في روي بذور
تطرح هنا للكون
و صبح لسه جنين
يقضل كن .. فأكون
أعشق .. أموت م العشق
أطلب وصالك .. بكأ
أنزل ف نقطة ندي
تترد فيا الروح
و أنا ببتي البسمله
و ف إيدي حبة ضي

السويس الجمعة : ٢٠٠٥/٩/٢٣

معزوفة الحرية

إغسل قلبك بالندي
إفرد جناحك وعيش
إعزف على وتر الحياة
لحن حريه
مرجحة الريح مُتعتك
قضبان همومنا ... تيموتك
إملا جوفك م المدي
و اشبع غنا
كدحان سفر
بتحطنا على سور شقاوة الروح
بتعلمنا ..
أول درس على سبورة الدنيا
دوس على أخوك .. بس استره

اوعى وجعه .. تنشره
و اما تتفنن فى موته
اترمي ف صدر البكا
و طبطب على روحه .. اعصره
يختفي ذنبك ف لونك
تعلي فوق سحب الندم
و احنا ... ننسى نتعجن
بطين البراءه
نستخبى ف سراديب الزمن
نتوه عن عيون الحقيقه
ندور على روحنا
لحن تايه على وتر الحياه

السويس ١٥ يونيو ٢٠٠٤

الشارع

نفس الوشوش الصبوحه
بتطلّ عليّ م الشبابيك
و بترمي الصباح
السبت الفاضي بيتاوب
و بيتمرجح م الدور الرابع
دايب من لمسة إيد الست
للحبل الواقع ف غرام
صوابعها
الشارع فاتح بّقه
بيخرّج طوابير شقيانه
مزنوقه ف بيوت تكعيبه
طابقين على بعض
م يصدقوا يفتحوا باب الصبح

لاجل ما يتنفرطوا ع الأرض
و أنا لسه بسلك روعي
من آخر حلم
و بشد عنيه لاجل ما يبعد
صوت المدرسه بيجلجل
و بيتوعد تأخيرى
أرمي نفسي في حضن هدومي
و أركب سلاام السكه
و افرد ضحكتي للشمس
و أبوس النهارده
و أقفل باب الجدل الخلفي

السويس

بره حِماكَ

يا ربنا .. يا رب

شايِف هموم الروح

و نوايا أفعالنا

ساكن هبوب الريح

وقتِن تبعترنا

و ف قرص نور الشمس

لمسة حنان منك

بتقول نعيش ..

فنعيش

يارب ما أجملك

أنا قد إيه باعشقتك

نفسي ألمس ضياك

إن شالله أموت بعدها

ده خيالي فى القدرة
و ف تكوينات كونك
عدا الغيوم .. و سرح
ف آياتك اتبعتر
و اتلم واتعثر
اتشال على موجه
غرقاته فى المقدور
بتسبحك يارب
ساعة السكون
و ساعتن تفور
يا ربنا .. قلبي
هيدوبه عشقي
نفسى اغيب فى الوصل

أُتلاشي شكل و لون
أعود لبطن الأرض
أسبّحك على طول
يا ساكن الروح
قلبي سكن نورك
لو تقبله .. هيعيش
عابد ف ضل صفاك
يحلم بلحظة عفو
يغمر قلوب الكون
و تعود بدايتنا
مخفيه سوءاتنا
نقطف من الجنه
نسمع كلامك .. قوي

لا ناكل التفاح
و لا نستمع للغوي
علشان يجرجرنا
بره حماك
يا رب

السويس ٢٣/٩/٢٠٠٥

كلام للروح

بتحليليني من تعاويذ الزمن
و تنيميني فوق حدود الطين
و تشمسي قلبي
اللي داب ف الطلّ
تنسي الوجد روي
و ف موج صفاكي باكون
ضي ف جبينك بانحني
و بتزرعيني جفون
اتعطلت لغة الكلام
لما جفيتيني
اتبعت الشوق اللي مرمي
ع الشجر ..
ساعتن هجرتيني

و فردت عینک ع المدی

و ف لحظه ..

سبتینی

السویس ۱۹۹۶/۵/۱۰

أغنية قديمه للوطن

صمتك بيقتلني
و بييعترني تحت
رجليك فتافيت
و اللي اتكوي بالعشق
زي للوطن .. قلبه خفيف
ساعة ما يعلن حبه
يمسك كل الضل ف إيد
لأجل الشمس ما تحضن
كل تراب الأرض
دهشة عيونك
بتشقني نصين
و اللي اتكوي بالحزن
زي ع الوطن

يلف عُمره على كتفه
شال ترحيله
و يصاحب همّه و دمعّه
و خطوة رجليه
و يحس بدقة قلب الأرض
و بطبل ف قلبه يسد
مسام ... العمر

* * *

كل ما بتفرّج
ع الصور المسنوده
على حيطه الألبوم
بمووت م الحب
و بولع قلبي طاقة قرن

يمكن يسيح الصوان
اللي اتربع فيه
يوم ما اتخرس صوتك
أنا بردّه سكت
أتقنت دور فاقد الذاكره
بس ما أتعلق جسمي
ف بوز مسمار
مهوش من صلب البيت
اتشق عمري
صرخت سنين العشق
و غربلتني قسايد الحرمان
حببت أبوح بالبكا
حلفتني دمعته ف عيونك

ماحفظهاش للحزن
و لا انهش ف استسلامها
و لا اعلن للعالم هوان الحلم
المتصور على حيلة أيامها
شيلت غرامي ف قلبي
و اكتفيت بأغنيه قديمه
بتشيد روعي
بحبال الوطن

السويس ٢٠٠٤/٣/١٧

أم حابي

متولّفه الروح على نبض طميك

و حُضن غريلة العجين

و زعقة التوته ف نهارك

من رميها طول السنين

لجلن تجود بالعسل

يا أم حابي

على حُضن الشواشي سلام

و ضَمَّت عافيت السكه

و طَقَّت قَرَّيت الفاتحه

و لَمَّت غيمت التنهيد

بنبوس اقدام الليل

لجلن يغير معاده

و نوصي سعت الفجر

تنفرد حبّه
لجلن يدور العجل
و يحن قلب اليوم
و نشوف عيون الأمل
تنفض سنين النوم
شرفض آيات الهدم
تطرح هنا ليكي
و تعجن الحنه
تطول إديها الصبي
يسبق ف حيل بكره
يرمح حصان الزمن
يطرح لفوق شجره
و ضحكه ف عيونك

و زرع للمطره
و بيت و ضلّايه
و حضن للشقيان
و توتّه و حكايه
و شاي ف عز البرد
ينشدّ صهر الشقا
يفرد ف عفتنا
نترد ستر لعودك
و حروف لكمتنا
يا أم حابي
يا غازله لمتنا

السويس / ديسمبر ١٩٩٦

طياره ورق

بحرين دفا
شطين سلام
ننين عيون
واحة امانى مفرعه
و صفصافه
و انا .. تحت منها باختفي
عن عين زمانى
و اتوه ف دوامة خضارها
المرمرى
و اترد تانى
دايبه شريطتى ف الضفيره
و حبة السكر تحلى الحلم
بالونة احلامنا كبيره

تَمُط سَنِينَا .. تَتَكُور
يَفْرَقُ حِلْم مِيهِمْش
كَتِير غِيرَه .. بِيْتَبْخِر
نَعُود نَتْرَد فَوْق الشُّط
غَنَاوِي .. بَحْر مِنْ دَمْعَه ..
وَتَنْهِيْدَه ..
وَدَايِرَه تَلِف تَبْلَعَا
و طَيَّارَه وَرَق تَعْلِي
تَوَصَّل صَوْتْنَا فَوْق لِّلْكَوْن
نَشْد فِي حَبْل ثَوَانِيْهَا
و اَتَارِيْهَا
قَابِضَه بَجْد
عَلَى سَنِينَا

الفهرس

الصفحة

١	- إهداء	٣
٢	- عَقْد الكلام	٤
٣	- موضه قديمه	٧
٤	- مناطق للحزن	١٠
٥	- المولد	١٣
٦	- البتاويت	١٩
٧	- دنيا	٢٤
٨	- تقدر تكمل	٢٧
٩	- بره نفسي	٣٠
١٠	- سجون العتمه	٣٣
١١	- الورق	٣٦
١٢	- سندريلا	٣٩
١٣	- اربع حروف و قمر مستتي علي سطح بيتنا	٤٣
١٤	- سابحه في شلال دمي	٤٨
١٥	- قرص الشمس	٥١
١٦	- امنيات مبيتحققش	٥٤
١٧	- رحم الكون	٥٧
١٨	- بدايه حزينه	٥٩

الصفحة

١٩-	احساس	٦٠
٢٠-	غلب	٦١
٢١-	شريط ستان	٦٢
٢٢-	زلزله	٦٦
٢٣-	صوره زفاف	٦٨
٢٤-	مسأله قسم	٧٠
٢٥-	وعد البنفسج	٧٣
٢٦-	تلج	٧٦
٢٧-	حكاوي شهر زاد - الحكايه الخامسه	٧٧
٢٨-	طفل جميل	٨٣
٢٩-	فتي اسمر	٨٨
٣٠-	ضي في عيني واصل لسقف الروح	٩٣
٣١-	الكابوس	٩٧
٣٢-	صوره ابويا	١٠٠
٣٣-	محاولة	١٠٢
٣٤-	من غير ما اخاف	١٠٤
٣٥-	طاقه نور	١٠٩
٣٦-	معزوفه الحريه	١١٤

الصفحة

- ٣٧- الشارع ١١٦
٣٨- بره حماك ١١٨
٣٩- كلام للروح ١٢٢
٤٠- اغنيه قديمه للوطن ١٢٤
٤١- ام حابي ١٢٨
٤٢- طياره ورق ١٣١

رقم الإيداع بدار الكتب

2006/7831

الترقيم الدولي I.S.B.N

977- 374- 187- 7

دار الإسلام للطباعة والنشر

0122614363 - 050/2266220